

**D.R. 14/2023**

**RANG UNDANG-UNDANG**

*b e r n a m a*

Suatu Akta untuk meminda Akta Keterangan Saksi Kanak-Kanak 2007.

[ ]

**DIPERBUAT** oleh Parlimen Malaysia seperti yang berikut:

**Tajuk ringkas dan permulaan kuat kuasa**

**1.** (1) Akta ini bolehlah dinamakan Akta Keterangan Saksi Kanak-Kanak (Pindaan) 2023.

(2) Akta ini mula berkuat kuasa pada tarikh yang ditetapkan oleh Menteri melalui pemberitahuan dalam *Warta* dan Menteri boleh menetapkan tarikh yang berlainan bagi permulaan kuat kuasa peruntukan yang berlainan Akta ini.

**Pindaan seksyen 2**

2. Akta Keterangan Saksi Kanak-Kanak 2007 [Akta 676], yang disebut “Akta ibu” dalam Akta ini, dipinda dalam seksyen 2—

(a) dengan memasukkan selepas takrif “pegawai polis” takrif yang berikut:

‘ “pendengaran khas” ertinya suatu pendengaran khas yang dikendalikan oleh Mahkamah, yang keterangan pemeriksaan utama, pemeriksaan balas dan pemeriksaan semula seseorang saksi kanak-kanak direkod terlebih dahulu;’; dan

(b) dalam takrif “saksi kanak-kanak”, dengan menggantikan perkataan “enam belas tahun” dengan perkataan “lapan belas tahun”.

**Pindaan seksyen 3**

3. Subseksyen 3(1) Akta ibu dipinda—

(a) dalam perenggan (b), dengan memotong perkataan “atau” di hujung perenggan itu;

(b) dalam perenggan (c), dengan menggantikan noktah di hujung perenggan itu dengan perkataan “; atau”; dan

(c) dengan memasukkan selepas perenggan (c) perenggan yang berikut:

“(d) melalui pendengaran khas.”.

**Seksyen baharu 6A dan 6B**

4. Akta ibu dipinda dengan memasukkan selepas seksyen 6 seksyen yang berikut:

**“Pendengaran khas**

**6A.** (1) Jika Mahkamah mengarahkan supaya keterangan saksi kanak-kanak diberikan melalui suatu pendengaran khas, Mahkamah boleh menentukan masa dan tempat di mana pendengaran khas hendaklah dikendalikan dan orang yang boleh hadir semasa pendengaran khas itu.

(2) Semasa pendengaran khas itu, seseorang saksi kanak-kanak hendaklah mula-mulanya diperiksa secara utama oleh pihak kepada prosiding yang memanggilnya, kemudiannya, diperiksa balas jika dikehendaki sedemikian oleh pihak menentang, kemudiannya pula, diperiksa semula jika dikehendaki sedemikian oleh pihak yang telah memanggil saksi kanak-kanak itu.

(3) Jika keterangan saksi kanak-kanak telah diberikan melalui suatu pendengaran khas, saksi kanak-kanak itu tidak boleh dipanggil semula untuk pemeriksaan utama, pemeriksaan balas atau pemeriksaan semula selanjutnya dalam prosiding kes itu melainkan jika Mahkamah berpuas hati bahawa—

- (a) pemeriksaan itu diminta oleh suatu pihak kepada prosiding itu disebabkan setelah pihak itu menyedari pada masa keterangan itu direkodkan mengenai hal perkara yang tidak dapat dipastikan oleh pihak itu dengan usaha yang munasabah pada ketika itu; atau
- (b) demi kepentingan keadilan untuk membenarkan pemeriksaan lanjut saksi kanak-kanak itu jika keterangan saksi kanak-kanak itu didapati oleh Mahkamah penting untuk mencapai keputusan yang adil dalam kes itu.

(4) Seseorang saksi kanak-kanak semasa pendengaran khas boleh memberikan keterangan dengan cara mengadakan suatu pengadang di antara kanak-kanak itu dengan tertuduh atau kanak-kanak yang dipertuduh atas mana-mana kesalahan atau dengan cara rangkaian secara langsung atau gabungan kedua-duanya.

(5) Bagi maksud seksyen ini, Mahkamah boleh, jika perlu, memberikan apa-apa arahan mengenai apa-apa hal perkara lain yang berhubungan dengan pendengaran khas sebagaimana yang Mahkamah fikirkan sesuai.

### **Soalan tidak wajar**

**6B.** (1) Mahkamah hendaklah melarang apa-apa soalan tidak wajar kepada saksi kanak-kanak yang didapati oleh Mahkamah sebagai—

- (a) memperdayakan atau mengelirukan;

- (b) menghina, menakut-nakutkan, mengaibkan, mengganggu, menggusarkan, menyinggung, menindas atau mengulang secara tidak perlu;
- (c) memperkecil-kecilkan dalam cara atau nadanya atau selainnya tidak sesuai; atau
- (d) tidak berasas malah yang membuat tanggapan stereotaip berdasarkan jantina, ras, budaya atau etnik, umur atau ketidakupayaan saksi kanak-kanak itu.

(2) Bagi maksud subseksyen (1), Mahkamah boleh mengambil kira umur, kematangan, kerentanan atau ketidakupayaan saksi kanak-kanak itu dan juga latar belakang budaya atau kepercayaan agama saksi kanak-kanak itu.”.

### **Pindaan seksyen 7**

**5.** Seksyen 7 Akta ibu dipinda dengan menggantikan perkataan “enam belas tahun” dengan perkataan “lapan belas tahun”.

### **Pindaan seksyen 13**

**6.** Seksyen 13 Akta ibu dipinda—

- (a) dalam nota bahu, dengan menggantikan perkataan “**enam belas tahun**” dengan perkataan “**lapan belas tahun**”; dan
- (b) dengan menggantikan perkataan “enam belas tahun” dengan perkataan “lapan belas tahun”.

---

### **HURAIAN**

Rang Undang-Undang ini bertujuan untuk meminda Akta Keterangan Saksi Kanak-Kanak 2007 (“Akta 676”). Tujuan Akta yang dicadangkan ini adalah untuk menambah baik perlindungan terhadap saksi kanak-kanak dengan menaikkan umur saksi kanak-kanak daripada enam belas tahun kepada lapan belas tahun, dengan memasukkan peruntukan yang berhubungan dengan pendengaran khas bagi saksi kanak-kanak memberikan keterangan dan dengan melarang soalan tidak wajar kepada saksi kanak-kanak.

2. *Fasal 1* mengandungi tajuk ringkas dan peruntukan mengenai permulaan kuat kuasa Akta yang dicadangkan.
3. *Fasal 2* bertujuan untuk meminda seksyen 2 Akta 676 untuk memasukkan takrif baharu “pendengaran khas” dan untuk meminda takrif “saksi kanak-kanak” untuk menaikkan umur saksi kanak-kanak daripada enam belas tahun kepada lapan belas tahun.
4. *Fasal 3* bertujuan untuk meminda seksyen 3 Akta 676 untuk menyatakan pendengaran khas sebagai salah satu cara bagi saksi kanak-kanak memberikan keterangan di bawah Akta 676.
5. *Fasal 4* bertujuan untuk memasukkan seksyen baharu 6A dan 6B ke dalam Akta 676. Seksyen baharu 6A yang dicadangkan memperuntukkan mengenai pendengaran khas yang keterangan pemeriksaan utama, pemeriksaan balas dan pemeriksaan semula seseorang saksi kanak-kanak direkod terlebih dahulu. Ini akan membolehkan keterangan tersedia yang terbaik diperoleh daripada seseorang saksi kanak-kanak. Sementara itu, seksyen baharu 6B yang dicadangkan memperuntukkan mengenai larangan soalan tidak wajar dikemukakan kepada seseorang saksi kanak-kanak.
6. *Fasal 5* dan *6* bertujuan untuk meminda seksyen 7 dan 13 Akta 676 masing-masing berbangkit daripada kenaikan umur saksi kanak-kanak yang dicadangkan.

*IMPLIKASI KEWANGAN*

Rang Undang-Undang ini akan melibatkan Kerajaan dalam perbelanjaan wang tambahan yang amaunnya belum dapat ditentukan sekarang ini.

[PN(U2)3324]